

“Sa Paxi”

*De torrai no c'est versu
Sempri pag'arrespetada,
Mi parit meda atesu
Paxi tanti aspetada.*

*De is attatzas spreada
Amori ti depiant teni,
Po apretu aclamada
Trabalosa a susteni.*

*Est pagu s'umilidadi
De is mannus e piticus,
Grandu vitzius ncu adi
Tra poburus e arricus.*

*Issa meda bregunjosa
Caminat in punt''e pei,
De totus amanti sposa
Bramada puru de mei.*

*Renniat pagu cun nosus
Amigus, fradis che ogu,
Sempri canis arrunjosus
Po zitzanias su logu.*

*Arribada in su mundu
De manna antiga data,
Pinigat sa gent'in tundu
Ch'est frutu de cudda mata.*

*Ses perdiu s'arrespetu
In casi totus cunfinis,
Mundu no est prus deretu
Po susteni bonus finis.*

*Nascia cun s'onnipotenti
Est donu de su Divinu,
In terra pongant a menti
Totus ti depint s'inchinu.*

*Dda imperant sceti candu
Fait comudu cuss'arti,
Genti de artu cumandu
Dda tenit posta a parti.*

*Candu t'apetigant mi citu
O potenti grandu dama,
Rennias in donnia situ
Amurosa che'na mama.*

*Cun patus scritus in paperis
Totus dda bollint difendi,
Su chi disponint is meris
Prima tocat a intendi.*

*Est puru sa chi arcansat
Depemus fai tesoru,
Bratzolu chi arreposat
Menti, animu e coru.*

*S'omini in gordijosu
Dda sempri posta in gruxi,
Ajudasì Gloriosu
A dda torrai a luxi.*